

MESYUARAT KEDUA, PENGGAJ KEEMPAT
PARLIMEN KEEMPAT BELAS
2021

HARI SELASA : 16 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 8 HINGGA NO. 44)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. WAN AZIZAH WAN ISMAIL
[PANDAN]**

TARIKH : 16 NOVEMBER 2021 (SELASA)

SOALAN

Minta **PERDANA MENTERI** menyatakan sejauh manakah perkembangan Dasar Perlindungan Sosial yang telah dirangka pada tahun 2019 telah dilaksanakan.

JAWAPAN

**DIJAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Kerajaan sedang membangunkan pelan induk perlindungan sosial negara dengan mengambil kira hasil pemetaan dan rasionalisasi program perlindungan sosial sedia ada. Ini bagi memastikan dasar yang dibangunkan ini bersifat dinamik dan komprehensif serta seharusnya mengikut trend peralihan demografi semasa.

2. Pelan induk ini sekali gus dapat memastikan liputan perlindungan sosial yang menyeluruh kepada semua rakyat di bawah tiga teras utama iatu Bantuan Sosial, Insurans Sosial dan Intervensi Pasaran Buruh serta disokong oleh pengurusan data dan tadbir urus perlindungan sosial yang menyeluruh di peringkat persekutuan dan di peringkat negeri.

3. Seperti mana yang YB sedia maklum, Majlis Perlindungan Sosial Malaysia atau Malaysia Social Protection Council yang selepas ini saya akan sebut selepas ini sebagai MySPC telah ditubuhkan oleh Jemaah Menteri pada 28 Oktober 2016 dan kesinambungannya diaktifkan semula oleh YB pada 29 Mei 2019. Justeru, pelan induk perlindungan sosial ini sedang dimurnikan oleh MySPC bersama-sama dengan 4 Jawatankuasa Kerja iaitu:

- (i) Jawatankuasa Kerja Bantuan Sosial – diketuai oleh Kementerian Pembangunan Wanita, Keluarga dan Masyarakat (KPWKM)
- (ii) Jawatankuasa Kerja Insurans Sosial – diketuai oleh Kementerian Kewangan (MOF)
- (iii) Jawatankuasa Kerja Intervensi Pasaran Buruh – diketuai oleh Kementerian Sumber Manusia (KSM)
- (iv) Jawatankuasa Kerja Pengurusan Data – diketua oleh Jabatan Perangkaan Malaysia (DOSM)

4. Sementara dasar tersebut siap digubal, MySPC bergerak melalui pelan tindakan perlindungan sosial berdasarkan lima (5) teras utama yang digariskan iaitu:

- (i) Rasionalisasi dasar dan program perlindungan sosial;
- (ii) Pemerkasaan penyampaian perkhidmatan & pengurusan sumber program perlindungan sosial;
- (iii) Pengurusan data yang berintegriti dan efisien;
- (iv) Penentuan liputan kumpulan sasar perlindungan sosial; dan
- (v) Pemerkasaan kumpulan sasar perlindungan sosial.

5. Secara keseluruhannya, pelan tindakan ini mengandungi sebanyak 15 strategi pelaksanaan dan 90 inisiatif yang direncanakan merentasi empat (4) Jawatankuasa Kerja tersebut. Terdapat 56 inisiatif jangka pendek (kurang 2 tahun) dan 34 inisiatif jangka panjang (lebih 2 tahun). Garis masa pelaksanaan pelan tindakan ini adalah dalam tempoh lima (5) tahun bermula dari tahun 2021 sehingga tahun 2025.

NO. SOALAN : 8

6. Sehingga 27 Ogos 2021, sebanyak sebanyak 509 program daripada 30 kementerian/agensi telah dipetakan. Sebanyak 13 juta rekod profil kumpulan sasar perlindungan sosial juga telah dipetakan di bawah Modul Bantuan Sosial melibatkan 17 agensi pelaksana program manakala bagi data profil modul insurans sosial dan intervensi pasaran buruh sedang dipetakan dan dijangka siap pada Q2 2023. Elemen perlindungan sosial ini juga turut diambil kira oleh pihak Kerajaan dalam penyediaan bajet kewangan negara setiap tahun.

7. Melalui MySPC ini dapat membantu Kerajaan mencapai aspirasi Keluarga Malaysia dalam memastikan tiada rakyat yang tercicir dalam liputan perlindungan sosial negara.

Sekian, Terima Kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN CHAN FOONG HIN [KOTA
KINABALU]**

TARIKH : 16 NOVEMBER 2021 (SELASA)

SOALAN

TUAN CHAN FOONG HIN [KOTA KINABALU] minta MENTERI LUAR NEGERI menyatakan sama ada Malaysia berhasrat menyertai Organisasi Kerjasama Shanghai sebagai rakan dialog.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kota Kinabalu atas pertanyaan yang dikemukakan.

Tuan Yang di-Pertua,

2. Buat masa ini, Malaysia tidak berhasrat untuk menyertai Organisasi Kerjasama Shanghai atau dengan izin, *Shanghai Cooperation Organization* (SCO) sebagai Rakan Dialog.

3. Untuk makluman Ahli Yang Berhormat juga, Malaysia mempunyai hubungan yang baik dengan semua negara-negara ahli, rakan dialog serta pemerhati kepada organisasi SCO ini. Malaysia juga sudah mempunyai mekanisma melalui berbagai forum serantau dan antarabangsa untuk berinteraksi serta mengadakan kerjasama politik, ekonomi dan keselamatan dengan kesemua negara-negara yang berkaitan dengan SCO.

NO. SOALAN : 10

4. Penglibatan Malaysia di dalam sesuatu pertubuhan banyak mengambilkira kedudukan geografi, kepentingan pragmatik dan strategik negara. Malaysia akan mengambilkira kemampuan negara di dalam melaksanakan komitmen serta melihat sejauh mana relevannya sesuatu pertubuhan serantau mahupun antarabangsa kepada keperluan semasa serta hala tuju negara. Pertimbangan sedemikian adalah penting bagi memastikan sumber negara digunakan dengan wajar dan mengikut perancangan strategik Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI MOHD. SALIM SHARIF [JEMPOL]

TARIKH : 16 NOVEMBER 2021 | SELASA

SOALAN

DATO' HAJI MOHD. SALIM SHARIF [JEMPOL] minta **PERDANA MENTERI** menyatakan kos baharu untuk mengerjakan ibadah haji dan umrah yang dijangka meningkat susulan perubahan Prosedur Operasi Standard (SOP) yang ketat dikuatkuasakan oleh kerajaan Arab Saudi.

JAWAPAN : (MENTERI DI JABATAN PERDANA MENTERI)

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang Di-Pertua,

Kos untuk seorang jemaah haji Muassasah menunaikan haji (Kos Haji) bagi musim 1440H/2019 lepas adalah RM22,900 seorang. Tiada Kos Haji untuk 2 tahun seterusnya kerana ibadat haji ditangguhkan untuk rakyat Malaysia bagi musim 1441H/2020 dan 1442H/2021 disebabkan pandemik Covid-19.

Kos Haji ini merupakan perbelanjaan bagi kos-kos langsung untuk penerbangan carter haji, penginapan, sajian makan dan perkhidmatan-perkhidmatan yang disediakan di Tanah Suci termasuk pengangkutan bas, mutawif dan perkhemahan di Arafah dan Mina.

Lembaga Tabung Haji (**TH**) sedang menyemak dengan terperinci kos-kos ini yang terkesan akibat kadar inflasi serta peraturan dan cukai baru di Arab Saudi. Ianya termasuk caj visa haji yang diperkenalkan oleh Kerajaan Arab Saudi bermula musim haji 1441H/2020 dan kenaikan kadar cukai tambah nilai (*Value Added Tax*) di Arab Saudi dari 5% kepada 15% bermula bulan Julai 2020.

Kos Haji juga dijangka meningkat disebabkan perkembangan terkini berkaitan prosedur operasi standard dan protokol kesihatan bagi membendung gejala jangkitan Covid-19 di kalangan jemaah haji. Ianya termasuk suntikan vaksin, keperluan ujian PCR untuk masuk ke Arab Saudi serta penjarakan fizikal dan lain-lain langkah keselamatan semasa di Tanah Suci. Pihak **TH** akan memaklumkan Kos Haji untuk musim 1443H/2022 apabila dimuktamadkan kelak.

Berkenaan dengan kos Umrah pula, Kementerian Pelancongan, Seni dan Budaya (MOTAC) baru-baru telah mengumumkan harga panduan bagi pakej ibadah umrah berdasarkan SOP dan syarat-syarat terkini yang ditetapkan oleh pihak berkuasa Arab Saudi.

Harga panduan bagi pakej 12 hari 10 malam dalam pengumuman itu adalah RM6,900. Walau bagaimanapun, kadar ini bukanlah harga tetap yang dikawal oleh mana-mana pihak. Sebaliknya, orang ramai boleh menjadikannya sebagai rujukan dan panduan dalam membuat pertimbangan untuk memilih syarikat dan pakej mana yang sesuai dengan bajet mereka. Orang ramai boleh mengambil langkah berhati-hati jika didapati harga yang ditawarkan terlalu rendah atau terlalu tinggi daripada yang telah ditetapkan bagi mengelak kes-kes penipuan pakej umrah. Peningkatan kos ini setelah mengambil kira beberapa faktor terkini melibatkan penginapan, pengangkutan, pengurusan mutawif serta ujian calitan COVID-19.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN HAJI MOHAMAD BIN SABU
[KOTA RAJA]**

TARIKH : 16 NOVEMBER 2021 (SELASA)

SOALAN

TUAN HAJI MOHAMAD BIN SABU [KOTA RAJA] minta **PERDANA MENTERI** menyatakan apakah hasil siasatan terhadap pegawai SPRM yang telah ditangkap melibatkan kes kehilangan wang sebanyak RM29 juta.

JAWAPAN

Tuan Yang di-Pertua,

Untuk makluman Yang Berhormat, Kertas Siasatan terhadap pegawai SPRM yang telah ditangkap melibatkan kes kehilangan wang sitaan ini telah dikemukakan kepada Jabatan Peguam Negara pada 1 Oktober 2021 dan kini sedang dalam tindakan dan arahan lanjut daripada Timbalan Pendakwa Raya.

Setakat ini SPRM masih melaksanakan siasatan berdasarkan arahan lanjut yang diterima daripada Jabatan Peguam Negara pada 1 November 2021 untuk melengkapkan siasatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 16 NOVEMBER 2021 (SELASA)

SOALAN

TUAN ABDUL LATIFF BIN ABDUL RAHMAN minta **PERDANA MENTERI** menyatakan apakah projek pembangunan yang disenaraikan di dalam RMK-12 kepada negeri Kelantan dan berapa daripada jumlah RM25.8 bilion bagi perkhidmatan air juga diperuntukkan kepada negeri Kelantan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan sentiasa memberi perhatian kepada keperluan dan kemakmuran rakyat di seluruh negara termasuk negeri Kelantan. Kerajaan juga sentiasa berusaha untuk memastikan kesejahteraan rakyat terus menjadi keutamaan bagi memelihara dan meningkatkan taraf hidup rakyat.

2. Untuk makluman Ahli Yang Berhormat, Kerajaan Persekutuan telah meluluskan sebanyak 373 projek untuk pelaksanaan di negeri Kelantan pada tahun 2021 dengan kos RM20.2 bilion dan peruntukan asal 2021 yang diluluskan adalah sebanyak RM1.8 bilion. Antara projek-projek pembangunan yang dilaksanakan di negeri Kelantan adalah melibatkan pembangunan sekolah, lebuh raya, jambatan, dan pembaikan cerun dan jalan.

3. Dengan mengambil kira kedudukan semasa kewangan negara, sebanyak RM2.4 bilion dicadangkan untuk tahun 2022 bagi meneruskan pelaksanaan projek tahun 2021 di negeri Kelantan. Peruntukan bagi perkhidmatan bekalan air di negeri Kelantan pada tahun 2022 berjumlah RM9.4 juta daripada RM716 juta DE Asas di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB DATUK ABD RAHIM BIN BAKRI (KUDAT)

TARIKH : 16 NOVEMBER 2021 (SELASA)

SOALAN

Datuk ABD RAHIM BIN BAKRI [KUDAT] minta **MENTERI KERJA RAYA** menyatakan status projek pembinaan Lebuhraya Pan Borneo bagi Pakej 9 (Serusup Tuaran ke Pituru Kota Belud) ditender dan bila tarikh mula kerja memandangkan projek ini sudah diluluskan dalam Bajet 2021.

JAWAPAN

Tuan Yang Di-Pertua,

Untuk makluman Ahli Yang Berhormat, pelaksanaan projek Lebuhraya Pan Borneo Sabah Fasa 1 dengan anggaran jarak keseluruhan 706 km dibahagikan kepada 35 pakej kerja. Sehingga kini, 16 pakej kerja telah komited untuk dilaksanakan, termasuklah pakej kerja yang melibatkan laluan dari Serusup ke Pituru sepanjang 20 km. Merujuk kepada soalan Ahli Yang Berhormat, pakej tersebut kini di dalam fasa pra-pelaksanaan dan dijangka akan ditender pada suku tahun pertama 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 16 NOVEMBER 2021 (SELASA)

Tuan Prabakaran A/L M Parameswaran [Batu] minta **MENTERI WILAYAH PERSEKUTUAN** menyatakan adakah YTL *batching plant* di Sentul Pasar ini mendapat kelulusan *Environment Assessment*, bagaimana sesuatu projek sebegini diluluskan dalam kawasan perumahan dan padat. Apakah tindakan yang akan diambil oleh Kementerian Wilayah Persekutuan dalam masa terdekat ini.

JAWAPAN:

Tuan Yang di-Pertua,

1. Untuk makluman Ahli Yang Berhormat Batu, berpandukan syarat-syarat yang telah ditetapkan oleh Jabatan Alam Sekitar, cadangan untuk mendirikan tapak Pembancuh Simen Sementara (Separa Tertutup) Bagi Membekalkan Simen Kepada Syarikat Yeoh Tiong Lay Sdn. Bhd. di Jalan Sentul, Kuala Lumpur oleh Tetuan Sentul Raya Sdn. Bhd. telah mendapat kelulusan Perintah Pembangunan pada 24 September 2013. Kebenaran Mendirikan Bangunan pula telah dikeluarkan pada 15 September 2015.

Kelulusan Environmental Impact Assessment (EIA)

2. Penempatan *batching plant* ini tidak memerlukan kelulusan *Environmental Impact Assessment* atau EIA, dengan izin. Jabatan Alam Sekitar pernah memberi ulasan pembangunan bertarikh 4 Januari 2019 bagi penempatan Loji Konkrit Sementara Separa Tertutup Di Atas Lot 206 & Lot 207, Lorong Timur Off Jalan Sentul, Mukim Kuala Lumpur untuk Tetuan C.I. Readymix Sdn Bhd. Penempatan loji pembancuh simen ini adalah bertujuan bekalan simen cair kepada pembangunan Sentul Raya, Sentul, Kuala Lumpur.

3. Pembangunan loji pembancuh simen ini telah mematuhi keperluan kriteria perancangan dan kehendak teknikal yang telah ditetapkan di dalam Garis Panduan Loji Pembancuh Simen (*Batching Plant*) Wilayah Persekutuan Kuala Lumpur, 2015. Berdasarkan kepada garis panduan ini, loji pembancuh simen sementara boleh dibenarkan di dalam tapak bina.

Tuan Yang di-Pertua,

4. Perintah Pembangunan yang diberikan ini adalah berbentuk terhad dan perlu diperbaharui setiap tahun. Lanjutan Perintah Pembangunan terkini telah pun dipertimbangkan dan diluluskan oleh Jawatankuasa Teknikal Pusat Setempat pada 30 Jun 2021 untuk tempoh sehingga 31 Disember 2021.

Tindakan Sekiranya Terdapat Pelanggaran Kelulusan

5. Salah satu syarat yang dikenakan dalam Perintah Pembangunan Terhad tersebut ialah syarat pematuhan kepada semua kehendak dari Jabatan Alam Sekitar mengenai kawalan pencemaran alam sekitar. Berdasarkan prosedur, pihak Jabatan Alam Sekitar akan membuat pemantauan secara berkala bagi pelepasan habuk dari cerobong berdasarkan Seksyen 31 Akta Kualiti Alam Sekeliling 1974.

6. Oleh yang demikian, sekiranya loji pembancuh simen ini melanggar syarat-syarat yang ditetapkan oleh Jabatan Alam Sekitar dan DBKL maka tindakan sita boleh dikenakan.

7. Untuk makluman, sehingga ke hari ini, tiada aduan diterima oleh Jabatan Alam Sekitar berkaitan pencemaran daripada operasi Loji Pembancuh Simen di lokasi ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 16 NOVEMBER 2021 (SELASA)

SOALAN

DATO' HAJI AHMAD NAZLAN BIN IDRIS minta **PERDANA MENTERI** menyatakan perancangan Kerajaan untuk membuat pengiraan semula nilai Pendapatan Garis Kemiskinan (PGK) dengan mengambil kira pendapatan, simpanan, pendidikan, kesihatan, dan dimensi-dimensi lain rakyat pasca pandemik COVID-19.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Izinkan saya untuk menjawab soalan berkaitan kajian semula Pendapatan Garis Kemiskinan (PGK) ini secara bersama dengan soalan YB Lenggong yang dijadualkan pada 22 November 2021, YB Kota Belud yang dijadualkan pada 25 November 2021 dan YB Labuan yang dijadualkan pada 7 Disember 2021.

2. Kerajaan akan mengemas kini klasifikasi pendapatan dan PGK pada tahun 2022 serentak dengan Survei Pendapatan, Perbelanjaan Isi Rumah dan Kemudahan Asas (HIES & BA) 2022. Untuk makluman Ahli Yang Berhormat, HIES & BA dijalankan dua kali dalam tempoh setiap lima tahun.

3. PGK adalah merujuk kepada jumlah pendapatan bulanan isi rumah yang diperlukan untuk memenuhi keperluan minimum makanan dan bukan makanan bagi membolehkan setiap ahli isi rumah menjalani kehidupan yang sihat dan aktif. PGK yang terkini dikemas kini iaitu pada tahun 2019 menggunakan metodologi PGK 2019 mengambilkira konsep kos keperluan asas dalam pemilihan barangan makanan dan bukan makanan. Pengukuran PGK makanan adalah berdasarkan konsep optimum minimum manakala PGK bukan makanan berdasarkan 146 barangan dan perkhidmatan asas. PGK mengambilkira peningkatan kualiti hidup dan corak perbelanjaan oleh kumpulan isi rumah berpendapatan 20 peratus terendah (B20). PGK 2019 juga menunjukkan perubahan harga semasa bagi barangan dan perkhidmatan.

4. Untuk melengkapi PGK, Kerajaan telahpun menggunakan Indeks Kemiskinan Pelbagai Dimensi (MPI) bagi mengukur kemiskinan dari pelbagai dimensi. Pada masa ini, MPI merangkumi 4 dimensi iaitu kewangan, pendidikan, kesihatan dan taraf hidup yang merangkumi 11 indikator. Dimensi dan indikator ini akan diperluas agar lebih komprehensif untuk mengukur kemiskinan pelbagai dimensi dengan lebih baik termasuk untuk mengambil kira ketersediaan jalur lebar dan peranti digital. Kaedah mengukur kemiskinan akan terus ditambah baik dalam memastikan keberkesanan inisiatif pembasmian kemiskinan dalam RMKe-12.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI ANWAR BIN IBRAHIM
(PORT DICKSON)**

TARIKH : 16 NOVEMBER 2021 (SELASA)

SOALAN

Minta **MENTERI KANAN PERTAHANAN** menyatakan apakah status terkini pembelian peluru berpandu (Starstreak), berapa jumlah nilai pembelian siapakah syarikat yang dipertanggungjawab bagi perolehan peluru berpandu ini.

JAWAPAN

Tuan Yang di-Pertua,

Berhubung perolehan Sistem Pertahanan Udara, *Very Short Range Air Defence* (VSHORAD) Starstreak, perolehan aset ini berdasarkan penggantian kepada Sistem Starburst yang telah ditamatkan perkhidmatan pada tahun 2015 kerana telah mencapai jangka hayat penggunaannya (*shelf life*). Sistem Starburst telah diperolehi Angkatan Tentera Malaysia (ATM) pada tahun 1992 dan telah digunakan oleh ketiga-tiga cabang perkhidmatan ATM iaitu Tentera Darat, Laut dan Udara selama 23 tahun.

Keputusan penggantian ini adalah merupakan keputusan dari ATM sendiri sebagai *end user*. Ia dilakukan melalui pendekatan secara holistik yang tidak hanya melibatkan pembelian sistem yang baharu tetapi ia juga melibatkan pelupusan sistem yang lama. Pada masa itu peruntukan adalah terhad dan ATM selaku *end user* telah mencadangkan untuk melaksanakan perolehan Starstreak ini dengan merangkumi pendekatan luar kotak iaitu melalui program *Buy-Back*. Ini demi memastikan tahap kesiagaan dan kemampuan pertahanan negara tetap berada pada tahap

optimum. Walaupun sebenarnya pada ketika itu kita berdepan dengan kekangan dari sudut ekonomi, namun penggantian terhadap Starburst ini tetap dilaksanakan demi keselamatan negara.

Tawaran program *Buy- Back* terhadap sistem Starburst yang pada masa itu akan dilupuskan melibatkan pembelian misil-misil yang telahpun lupus dan ATM mendapat nilai tambah sebanyak RM60 juta, di mana ATM telah memperolehi 9 buah *Armored Personal Carrier* (APC) yang dihantar terus ke Lubnan bagi penugasan ATM di bawah panji-panji Pertubuhan Bangsa-Bangsa Bersatu yang bernilai RM45.1 juta dan perolehan 107 buah kenderaan van domestik untuk pelbagai guna yang merangkumi 81 unit van penumpang, 20 unit van jenazah dan 6 unit ambulan Type C yang bernilai RM14.9 juta.

Sebagai makluman Yang Berhormat, perolehan Starstreak ini telah pun selesai dengan sempurna dan kesemua peralatannya telah diterima pada tahun 2019. Nilai keseluruhan perolehan ini adalah berjumlah RM897 juta dengan kontrak perolehan ini telah dimeterai dengan Syarikat Global Komited Sdn Bhd. Kontrak perolehan syarikat ini juga telah diiktiraf dan diberi penghargaan oleh Yang Berhormat Kota Raja sendiri pada tahun 2019 di atas kejayaan dan pencapaian yang melangkaui obligasi kontrak pelaksanaan *Industrial Collaboration Programme* (ICP).

Perolehan Starstreak ini telah pun memanfaatkan ketiga-tiga cabang perkhidmatan ATM iaitu Tim Bateri 32 Rejimen Artileri Diraja Tentera Darat, Pasukan Pertahanan Udara (PPU) TLDM dan Skuadron 401 TUDM.

Terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' SERI TIONG KING SING
[BINTULU]**

TARIKH : 16 NOVEMBER 2021 (SELASA)

SOALAN

DATO' SERI TIONG KING SING [BINTULU] minta **KEMENTERIAN
PERDAGANGAN ANTARABANGSA DAN INDUSTRI** menyatakan:

- a. Apakah usaha Kerajaan untuk meningkatkan peranan Malaysia dalam industri semikonduktor global?
- b. Apakah rancangan Kerajaan dalam membantu industri semikonduktor tempatan yang berada di hilir industri untuk transformasi ke hulu industri?

JAWAPAN

Tuan Yang di-Pertua,

Malaysia sememangnya merupakan antara negara utama di dalam rantai semikonduktor global. Sektor elektrik dan elektronik (E&E) merupakan penyumbang utama KDNK negara bagi sektor pembuatan iaitu sebanyak 24.7 peratus pada tahun 2020. Bagi tahun yang sama, sektor ini mencatatkan pelaburan yang diluluskan bernilai RM15.6 bilion bagi 148 projek iaitu sebanyak 17.1 peratus daripada jumlah pelaburan yang diluluskan (RM91.3 bilion). Nilai perdagangan bagi sektor E&E pula mencatat RM638.9 bilion berbanding RM618.7 pada tahun 2019, di mana eksport produk E&E berjumlah RM386.1 bilion, atau 39.4 peratus daripada jumlah barang pembuatan yang dieksport sebanyak RM847.7 billion.

Malaysia adalah antara negara utama dalam perdagangan semikonduktor global yang menyumbang sebanyak tujuh peratus daripada perdagangan semikonduktor dunia, merangkumi 13 peratus daripada proses pemasangan, pengujian dan pembungkusan cip global (*outsourced semiconductor assembly and test – OSAT*). Rantai nilai pembuatan semikonduktor adalah terdiri daripada komponen rekabentuk litar bersepadu (*integrated circuit design - IC*), perkhidmatan penyelesaian reka bentuk dan kejuruteraan (*engineering and design solution services*), fabrikasi wafer dan OSAT.

Kedudukan Malaysia sebagai pangkalan utama untuk menguji dan membungkus cip adalah sangat penting kerana ini adalah langkah terakhir bagi pengeluaran semikonduktor. Ekosistem ini yang diterajui oleh syarikat-syarikat multinasional (*Multinational Companies - MNC*) turut disokong oleh syarikat-syarikat tempatan.

Industri semikonduktor tempatan adalah komprehensif merangkumi seluruh rantai bekalan pengeluaran semikonduktor. Di dalam pengeluaran semikonduktor, rekabentuk litar bersepadu merupakan aktiviti di peringkat awalan atau hulu (*upstream*) sebelum aktiviti fabrikasi wafer. Ia merupakan aktiviti bernilai tambah tinggi dalam ekosistem pembuatan semikonduktor yang mempengaruhi ciri-ciri dan

prestasi sesebuah cip. Terdapat lebih daripada 19 buah syarikat *fabless* atau *IC design house* yang beroperasi di Malaysia. Syarikat *fabless* atau *IC design house* merupakan syarikat semikonduktor yang hanya menjalankan aktiviti merekabentuk semikonduktor. Kini, Malaysia berjaya menghasilkan syarikat tempatan dalam bidang rekabentuk litar bersepadu yang mempunyai reputasi tinggi seperti Infinecs, Oppstar, Symmid dan Skyechip yang merupakan sebahagian daripada rantaian nilai global. Di samping itu, negara juga telah mempunyai syarikat tempatan yang berupaya menyediakan perkhidmatan penyelesaian reka bentuk dan kejuruteraan (*engineering and design solution services*) seperti Testhub dan JF Technology.

Malaysia turut mempunyai enam (6) buah fasiliti fabrikasi wafer iaitu SilTerra, XFab, Infineon, On Semiconductor, Fuji Electric dan Osram. Penempatan aktiviti fabrikasi wafer ini telah mengembangkan ekosistem industri semikonduktor di Malaysia dan menjenamakan negara ini sebagai salah satu rantaian bekalan utama bagi industri semikonduktor di rantau Asia.

Kerajaan sentiasa berusaha untuk memperkukuhkan daya saing dan daya tahan industri semikonduktor negara dengan mempertingkatkan pelaburan dalam aktiviti semikonduktor hulu dan hiliran yang melibatkan rekabentuk litar bersepadu, perkhidmatan kejuruteraan, fabrikasi wafer serta pemasangan, pengujian dan pembungkusan.

Dasar pelaburan baharu negara yang berteraskan Aspirasi Pelaburan Nasional (*National Investment Aspiration* - NIA) akan berupaya menyokong usaha Kerajaan ke arah meningkatkan pelaburan dalam keseluruhan rantaian nilai semikonduktor dengan menggalakkan penyelidikan, pembangunan, pengkomersialan dan inovasi (R&D&C&I), serta menyediakan tenaga kerja berkemahiran tinggi.

Pelbagai inisiatif dan insentif semasa ditawarkan bagi pertumbuhan dan kelestarian sektor E&E. Antaranya:

- a. Menawarkan pakej insentif yang kompetitif dalam bentuk pengecualian cukai pendapatan;

- b. Menyediakan geran padanan di bawah Dana Strategik Pelaburan Domestik bagi membantu syarikat semikonduktor tempatan beralih kepada industri berteknologi tinggi, nilai tambah yang tinggi, *knowledge-intensive* dan berasaskan inovasi. Dana ini akan memanfaatkan peluang penyumberan luar yang dicipta oleh MNC yang beroperasi di Malaysia, memperhebatkan pemerolehan teknologi oleh syarikat milik Malaysia, dan membolehkan syarikat milik Malaysia memperoleh piawaian atau pensijilan antarabangsa dalam industri strategik; dan
- c. Menggalakkan syarikat-syarikat tempatan menjadi sebahagian daripada rantai nilai global melalui program kerjasama dan integrasi dengan MNC yang memilih Malaysia sebagai pusat operasi serantau. Contohnya Western Digital di Batu Kawan, Pulau Pinang yang telah berjaya mendapat pengiktirafan *Global Lighthouse* iaitu menjadi sebahagian daripada rantai *World Economic Forum Global Lighthouse Network*.

Tuan Yang Di-Pertua,

Di bawah Rancangan Malaysia ke-12 (RMK-12), industri E&E juga telah disenaraikan sebagai satu daripada subsektor yang strategik dan berimpak tinggi yang akan dilonjakkan melalui pendekatan lebih sistematik bagi memastikan kemampanan pembangunan industri E&E. Ekosistem industri E&E ini akan diperkukuhkan lagi melalui strategi dan inisiatif di bawah MITI dengan kerjasama pelbagai kementerian, agensi, institusi pendidikan dan latihan, serta pihak industri yang terlibat. Syarikat-syarikat E&E akan terus digalakkan untuk mengadaptasi teknologi termaju dan menghasilkan aktiviti dan produk tambah nilai yang tinggi, pekerjaan berkemahiran tinggi, seterusnya menyumbang kepada peningkatan produktiviti dan pertumbuhan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 16 NOVEMBER 2021 (SELASA)

SOALAN

TUAN OSCAR LING CHAI YEW [SIBU] minta **PERDANA MENTERI** menyatakan rancangan Kerajaan untuk memulihkan ekonomi negara, terutama langkah-langkah untuk mengatasi masalah kekurangan dana Kerajaan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan telah mengambil langkah proaktif untuk mengatasi kemerosotan ekonomi dan merencanakan semula ekonomi negara yang telah terjejas akibat wabak pandemik COVID-19 melalui pelaksanaan pelbagai inisiatif di bawah pakej rangsangan ekonomi. Sehingga hari ini, Kerajaan telah memperkenalkan lapan pakej rangsangan ekonomi dan bantuan rakyat berjumlah RM530 bilion untuk memelihara kesejahteraan rakyat, memastikan kelangsungan perniagaan dan merangsang ekonomi. Pakej rangsangan yang telah diperkenalkan semasa awal penularan COVID-19 memberi fokus untuk menjaga kesejahteraan rakyat, menyokong kemampuan perniagaan, khususnya perusahaan kecil dan sederhana (PKS), dan memastikan kelangsungan kegiatan ekonomi utama. Ianya turut merangkumi langkah-langkah untuk melindungi dan mempromosikan pekerjaan serta membolehkan perniagaan mengekalkan operasi dan meningkatkan produktiviti secara beransur-ansur.

2. Kerajaan juga telah memperkenalkan Pelan Pemulihan Negara (PPN) pada 15 Jun 2021 sebagai strategi peralihan keluar dari krisis COVID-19 secara berfasa, teratur dan selamat. Sebagai sebuah pelan yang berpandangan ke hadapan dan anjal, PPN bertujuan untuk memastikan keseimbangan dalam usaha menyelamatkan nyawa, memastikan kelangsungan hidup rakyat dan memelihara kesejahteraan ekonomi. PPN mengguna pakai pendekatan seluruh negara dalam menangani krisis wabak ini dengan menggembeleng usaha semua pihak termasuk kerajaan negeri, sektor swasta, pertubuhan bukan kerajaan atau NGO, pakar-pakar malah kerjasama dengan parti-parti politik.

Tuan Yang di-Pertua,

3. Di samping itu, Rancangan Malaysia Kedua Belas (RMKe-12) yang merupakan rancangan pembangunan lima tahun negara, menggariskan tindak balas dasar yang menyeluruh dalam mendepani situasi yang mencabar akibat pandemik COVID-19. Strategi yang dilaksanakan dalam RMKe-12 akan mengambil kira pelbagai usaha untuk memulih dan menjana semula ekonomi yang terkesan disebabkan oleh COVID-19 serta menangani isu struktur ekonomi bagi memastikan pertumbuhan yang lebih inklusif dan mampan.

4. Untuk makluman Ahli Yang Berhormat juga, strategi hasil dan perbelanjaan telah diperkenalkan di bawah RMKe-12 bagi mengukuhkan kedudukan kewangan Kerajaan. Hasil Kerajaan akan dipertingkat melalui perluasan asas cukai, kajian semula insentif cukai, pengukuhan pentadbiran cukai serta pelaksanaan strategi hasil jangka sederhana. Selain itu perbelanjaan Kerajaan akan ditambah baik melalui pengenalan rangka kerja belanjawan dan perbelanjaan jangka sederhana, pelaksanaan penilaian perbelanjaan awam serta penambahbaikan pengurusan perolehan Kerajaan.

5. Kesemua langkah proaktif yang diperkenalkan oleh Kerajaan adalah bagi memastikan setiap lapisan rakyat terbela. Kerajaan percaya bahawa dengan pendekatan dan langkah yang telah diambil untuk menangani kesan daripada pandemik COVID-19, ekonomi negara akan kembali kukuh, berdaya tahan dan mampan bagi memastikan kebajikan dan kesejahteraan rakyat terus terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. SHAMSUL ANUAR
BIN HAJI NASARAH [LENGGONG]**

TARIKH : 16 NOVEMBER 2021 (SELASA)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **PERDANA MENTERI** menyatakan usaha Kerajaan dalam memulihkan imej dan apakah bentuk pembaharuan yang dirancang melibatkan institusi-institusi seperti Suruhanjaya Pencegahan Rasuah Negara (SPRM), Suruhanjaya Pilihan Raya (SPR) dan institusi Parlimen.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Suruhanjaya Pencegahan Rasuah Malaysia (SPRM) sedang memberi tumpuan kepada tindakan untuk memperkasakan SPRM sebagaimana inisiatif-inisiatif yang terdapat di dalam Pelan Anti Rasuah Nasional 2019-2023. Ini termasuklah dalam perkara-perkara berkaitan dengan pelantikan Ketua Pesuruhjaya, peruntukan kewangan, jawatankuasa pemantau, penubuhan suruhanjaya perkhidmatan dan tenaga kerja.

Selaras dengan penubuhan SPRM juga, lima mekanisme telah diwujudkan sebagai *check and balance* terhadap perjalanan SPRM dalam melaksanakan fungsi dan peranannya. Lima mekanisme tersebut adalah:

- a. Lembaga Penasihat Pencegahan Rasuah (LPPR);
- b. Jawatankuasa Khas Mengenai Rasuah (JKMR);
- c. Jawatankuasa Aduan (JKA);
- d. Panel Penilaian Operasi (PPO); dan
- e. Panel Perundingan dan Pencegahan Rasuah (PPPR).

Kelima-lima badan khas ini diwujudkan bertujuan untuk memastikan ketelusan dan akauntabiliti dalam keseluruhan perjalanan SPRM dan membantu memenuhi harapan masyarakat terhadap kebebasan, kecekapan, keberkesanan, ketelusan dan akauntabiliti Suruhanjaya dalam pelaksanaan kewajipan undang-undang yang telah ditetapkan.

Bagi Suruhanjaya Pilihan Raya (SPR) pula, Suruhanjaya ini merupakan sebuah institusi yang melaksanakan fungsinya mengikut Perkara 113 Perlembagaan Persekutuan yang merangkumi perkara-perkara yang berkaitan dengan urusan kajian persempadanan semula bahagian-bahagian pilihan raya, pendaftaran pemilih dan pilihan raya.

Cadangan pembaharuan yang melibatkan institusi SPR akan diteliti oleh sebuah Jawatankuasa Khas Kabinet bagi mengkaji kesesuaian pelaksanaannya. Ini kerana sebarang cadangan penambahbaikan SPR melibatkan pindaan ke atas undang-undang sedia ada termasuklah Perlembagaan Persekutuan.

Tuan Yang di-Pertua,

Kerajaan di bawah kepimpinan YAB Perdana Menteri telah memberikan komitmen penuh dalam melaksanakan transformasi pentadbiran Kerajaan. Komitmen ini dizahirkan dengan pelaksanaan Transformasi Parlimen dan Pentadbiran Kerajaan untuk mengembalikan kestabilan politik dan memulihkan ekonomi negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 16 NOVEMBER 2021 (SELASA)

SOALAN

TUAN LIM KIT SIANG [ISKANDAR PUTERI] minta **PERDANA MENTERI** menyatakan laporan kajian Jawatankuasa Reformasi Sistem Pilihan Raya yang dipengerusikan oleh Tan Sri Abdul Rashid Abdul Rahman yang telah diserahkan kepada Perdana Menteri sebelum ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Laporan Akhir Jawatankuasa Pembaikan Sistem dan Undang-Undang Pilihan Raya (ERC) yang berstatus embargo mengandungi 49 syor akan diteliti oleh sebuah Jawatankuasa Khas Kabinet.

Jawatankuasa Khas Kabinet yang ditubuhkan ini meneliti semua syor yang dikemukakan serta mengkaji kesesuaian pelaksanaannya. Ini kerana syor-syor ERC melibatkan perundangan dan bidang kuasa pelbagai kementerian.

Selain itu, syor-syor itu juga memerlukan pindaan kepada undang-undang sedia ada termasuklah pindaan kepada Perlembagaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
(SIBUTI)**

TARIKH : 16 NOVEMBER 2021(SELASA)

SOALAN

Minta **MENTERI KANAN PERTAHANAN** menyatakan adakah pihak Kementerian bercadang untuk membina sebuah masjid mercu tanda yang baharu di Kem Sri Miri 20th Regimen Askar Melayu Diraja bagi menggantikan Surau Darul Redzuan 20 RAMD memandangkan pembangunan masjid dapat menampung keperluan jemaah awam dan tentera di Kawasan Jalan Airport semakin meningkat.

JAWAPAN

Tuan Yang Dipertua,

Pembinaan masjid bagi menggantikan Surau Darul Ridzuan merupakan keperluan bagi melengkapkan fasilitasi di setiap formasi dan kem untuk peningkatan kerohanian anggota serta keluarga.

Untuk makluman Yang Berhormat, bangunan Surau Darul Ridzuan telah ditingkatkan kapisitinya dan dinaiktaraf kepada Masjid Darul Ridzuan pada 16 September 2017 oleh Majlis Agama Islam Sarawak dengan kapasiti 800 jemaah yang mana boleh digunakan oleh anggota tentera dan orang awam.

Terima kasih.

PEMBERITAHUAN PERTANYAAN LISAN
MESYUARAT KEDUA, PENGGAL KEEMPAT, PARLIMEN KE-14
DEWAN RAKYAT

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 16 NOVEMBER 2021 (SELASA)

SOALAN

DATUK IGNATIUS DARELL LEIKING [PENAMPANG] minta **PERDANA MENTERI** menyatakan adakah Kerajaan bercadang untuk mengklasifikasikan semula dengan melucutkan status rahsia Laporan Jawatankuasa Khas Kabinet berkaitan Penjanjian Malaysia 1963 dan status perbincangan 4 lagi perkara tertunggak dari 21 isu yang dibawa oleh Kerajaan Sabah memandangkan rakyat Sabah dan Sarawak berhak untuk mengetahuinya.

**JAWAPAN: YB DATUK SERI PANGLIMA DR. MAXIMUS JOHNTY
ONGKILI MENTERI DI JABATAN PERDANA MENTERI
(HAL EHWAL SABAH DAN SARAWAK)**

Tuan Yang di-Pertua,

1. Seperti mana Ahli Yang Berhormat sedia maklum, buat masa ini, Kerajaan kekal dengan pendirian bahawa tiada keperluan untuk membuat penarafan semula berhubung kerahsiaan Laporan Jawatankuasa Kabinet Untuk Menyemak Pelaksanaan Perjanjian Malaysia 1963 (JKKKMA63). Ini kerana laporan JKKKMA63 sebelum ini merupakan persetujuan dasar yang masih memerlukan tindakan sebelum dapat dilaksanakan. Justeru itu, Kerajaan Persekutuan wajar diberikan ruang untuk meneruskan perbincangan dengan Kerajaan Negeri Sabah dan Sarawak berhubung pelaksanaan perkara-perkara yang berkaitan. Sebarang kemajuan yang dicapai akan diumumkan oleh Kerajaan dari masa ke semasa.

2. Berhubung dengan **empat [4] perkara yang berkaitan minyak dan gas** iaitu (1) Royalti Minyak dan Pembayaran Tunai Petroleum; (2) Mineral Minyak dan Medan Minyak; (3) Akta Laut Wilayah 2012 [Akta 750] dan (4) Hak Negeri ke atas Pelantar Benua, kesemua perbincangan berkaitan perkara-perkara tersebut adalah ditangguhkan buat sementara waktu bagi memberi laluan kepada **penyelesaian secara komersial** yang sedang dibincangkan di antara Kerajaan Persekutuan, Kerajaan Negeri Sarawak, Kerajaan Negeri Sabah dan Petronas secara berasingan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 16 NOVEMBER 2021 (SELASA)

SOALAN

PUAN WONG SHU QI [KLUANG] minta **PERDANA MENTERI** menyatakan jumlah warganegara Malaysia berumur 18 ke atas yang telah membuat semakan maklumat peribadi mereka melalui sistem Semakan Pra-pendaftaran Automatik (SPPA) SPR sehingga 31 Oktober 2021.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Suruhanjaya Pilihan Raya (SPR) sedang dalam persiapan untuk melaksanakan pindaan Perkara 119 Perlembagaan Persekutuan iaitu berhubung umur kelayakan pengundi 18 tahun dan pendaftaran pemilih secara automatik sebagaimana yang diluluskan oleh Parlimen pada Mesyuarat Kedua Penggal Kedua Parlimen Keempat Belas seperti berikut:

Dewan Rakyat	16 Julai 2019
Dewan Negara	25 Julai 2019

Persiapan yang sedang dilaksanakan oleh SPR bagi pelaksanaan umur kelayakan pengundi 18 tahun dan pendaftaran pemilih secara automatik adalah meliputi:

- (i) pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan;
- (ii) penyediaan *standard operating procedures* (SOP); dan
- (iii) penyediaan sistem serta infrastruktur.

Di samping itu, SPR juga telah mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik seperti berikut:

- (i) membuat semakan maklumat bakal pemilih;

- (ii) membuat semakan di lapangan yang melibatkan bakal pengundi berumur 90 tahun dan ke atas;
- (iii) semakan di lapangan ke atas alamat untuk memastikan penentuan bahagian pilihan raya yang tepat;
- (iv) sesi libat urus dengan semua pihak-pihak yang berkepentingan;
- (v) program pendidikan pengundi kepada bakal pemilih; dan
- (vi) menyemak keperluan logistik bagi persediaan menghadapi Pilihan Raya Umum Ke-15 yang akan datang

SPR sedang mengadakan proses Semakan Pra-Pendaftaran Pemilih Automatik (SPPA) sehingga 31 Oktober 2021. SPPA diadakan bertujuan memberi peluang kepada warganegara Malaysia berumur 18 tahun dan ke atas sehingga 31 Disember 2021 dan belum mendaftar sebagai pemilih untuk menyemak dan mengesahkan maklumat mereka dengan SPR sebelum didaftarkan sebagai pemilih secara automatik. Sehingga **31 Oktober 2021**, daripada 5.8 juta orang bakal pemilih yang disasarkan oleh SPR, **seramai 357,591 orang bakal pemilih telah menyemak dan mengesahkan maklumat** mereka dengan SPR.

SPR menjangkakan semua persiapan yang sedang diambil tindakan termasuklah menangani isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada 31 Disember 2021.

Justeru, **SPR komited untuk memastikan umur kelayakan pengundi 18 tahun dan pendaftaran pemilih secara automatik dilaksanakan berdasarkan kepada keputusan semakan kehakiman di Mahkamah Tinggi Kuching, Sarawak pada 3 September 2021 yang lalu.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KESAVAN A/L SUBRAMANIAM
[SUNGAI SIPUT]**

TARIKH : 16 NOVEMBER 2021 (SELASA)

SOALAN

Minta **PERDANA MENTERI** menyatakan jumlah anggota dalam Perkhidmatan Awam Malaysia dan pecahan mengikut kaum sehingga suku kedua tahun 2021.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, berdasarkan status pengisian perjawatan di dalam HRMIS Jabatan Perkhidmatan Awam (JPA) setakat Oktober 2021, bilangan pegawai awam Persekutuan tidak termasuk anggota Polis Diraja Malaysia (PDRM) dan anggota Angkatan Tentera Malaysia (ATM) adalah seramai 992,765 orang.

2. Daripada jumlah tersebut, seramai 754,040 orang (75.95%) adalah kaum Melayu, 73,265 orang (7.38%) keturunan Bumiputera Sabah, 68,542 orang (6.90%) kaum Cina, 47,116 orang (4.75%) keturunan Bumiputera Sarawak, 41,168 orang (4.15%) kaum India, dan 8,634 orang (0.87%) lain-lain kaum. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 16 NOVEMBER 2021 (SELASA)

SOALAN

PUAN WONG SHU QI [KLUANG] minta **PERDANA MENTERI** menyatakan status terkini penggubalan Akta Kebebasan Maklumat seperti berikut:-

- (a) Jangka masa untuk membentangkan Rang Undang-Undang ini sama ada Kerajaan akan memansuhkan Akta Rahsia Rasmi 1972 semasa penggubalan RUU tersebut; dan
- (b) Rancangan Kerajaan untuk memastikan Akta Rahsia Rasmi 1972 diselaras dengan Akta Kebebasan Maklumat sekiranya ia tidak akan dimansuhkan.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, keputusan Kerajaan pada 11 Julai 2018 untuk Akta Kebebasan Maklumat digubal di peringkat Persekutuan adalah bertujuan untuk memastikan akses masyarakat kepada maklumat sahik secara lebih terbuka dan telus. Dalam hal ini, Kerajaan komited untuk memastikan cadangan penggubalan Akta ini dilaksanakan melalui sesi libat urus yang menyeluruh dengan semua pihak berkepentingan termasuk badan bukan kerajaan dan orang awam.

Berdasarkan sesi libat urus yang telah dilaksanakan bermula 2019 hingga kini, suatu kertas dasar berkaitan cadangan penggubalan Akta Kebebasan Maklumat ini dijangka akan dibentangkan dalam Mesyuarat Jawatankuasa Khas Kabinet Mengenai Anti-Rasuah (JKKMAR) pada Disember 2021. Kertas dasar ini antara lain akan mengandungi analisa dapatan sesi libat urus dengan pihak berkepentingan dan kajian perbandingan dengan kerangka perundangan negara luar bagi menggariskan ketetapan dasar berkaitan cadangan penggubalan Akta ini termasuk kelangsungan Akta Rahsia Rasmi 1972 [Akta 88].

Pertimbangan mengenai perkara ini harus mengambil kira implikasi kepada negara khususnya yang melibatkan keselamatan negara, pertahanan dan perhubungan antarabangsa sekiranya Akta 88 dimansuhkan. Pada masa yang sama, pertimbangan juga boleh dibuat untuk memastikan penyelarasan cadangan peruntukan-peruntukan Akta Kebebasan Maklumat dengan Akta Rahsia Rasmi 1972 terus berkuat kuasa. Dalam hal ini, semakan dan kajian lanjut sedang dilaksanakan Jabatan bertanggungjawab untuk meminda peruntukan-peruntukan tertentu dalam Akta Rahsia Rasmi 1972 bagi membolehkannya disesuaikan dengan keadaan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 16 NOVEMBER 2021 (SELASA)

SOALAN

PUAN WONG SHU QI [KLUANG] minta **PERDANA MENTERI** menyatakan senarai jumlah kes yang terlibat dalam siasatan, dakwaan dan sabitan di bawah undang-undang yang mengawal selia kebebasan bersuara, termasuk Akta Hasutan 1948, Seksyen 233 Akta Komunikasi dan Multimedia 1998, dan Ordinan Darurat (Kuasa-kuasa Perlu)(No. 2) 2021 menurut seksyen undang-undang yang digunakan dalam tempoh masa antara Mei 2018 hingga Februari 2020 dan Mac 2020 hingga Oktober 2021.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, senarai jumlah kes yang terlibat dalam siasatan, dakwaan dan sabitan di bawah undang-undang yang mengawal selia kebebasan bersuara bagi tempoh Mei 2018 hingga Februari 2020 dan Mac 2020 hingga Oktober 2021 mengikut Akta yang berkaitan adalah seperti berikut:

Akta Hasutan 1948

Tempoh	Kes disiasat	Kes didakwa	Kes disabitkan
Mei 2018 hingga Februari 2020	144	15	4
Mac 2020 hingga Oktober 2021	218	31	13

Seksyen 233 Akta Komunikasi dan Multimedia 1998

Tempoh	Kes disiasat	Kes didakwa	Kes disabitkan
Mei 2018 hingga Februari 2020	314	21	17
Mac 2020 hingga Oktober 2021	159	1	-

Ordinan Darurat (Kuasa-kuasa Perlu)(No. 2) 2021

Tempoh	Kes disiasat	Kes didakwa	Kes disabitkan
Mei 2018 hingga Februari 2020	-	-	-
Mac 2020 hingga Oktober 2021	30	12	5

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN (MUAR)**

TARIKH : 16 NOVEMBER 2021(SELASA)

SOALAN

Minta **MENTERI KANAN PERTAHANAN** menyatakan rancangan pertahanan negara untuk berhadapan dengan perkembangan kerjasama tiga hala antara Australia, United Kingdom dan Amerika Syarikat (AUKUS).

JAWAPAN

Tuan Yang Dipertua,

Ingin saya nyatakan disini bahawa Malaysia merupakan sebuah negara maritim yang terletak di laluan utama perdagangan antarabangsa yang dihubungkan melalui Selat Melaka dan Laut China Selatan. Oleh itu, keselamatan di Laut China Selatan dan Selat Melaka adalah amat penting bagi kemakmuran Malaysia yang banyak bergantung kepada import dan eksport menggunakan laluan laut.

Oleh kerana itu, Malaysia sentiasa mengambil perhatian yang tinggi terhadap keselamatan kawasan perairan negara. Pendirian Malaysia mengenai perlunya kawasan Asia Tenggara bebas dari senjata nuklear sentiasa disuarakan dalam platform-platform kerjasama dua hala mahu pun pelbagai hala.

Seperti yang direncanakan dalam Pelan Strategik MINDEF 2021-2025, Kementerian telah menggariskan keutamaan kepada usaha-usaha Peningkatan Kesiagaan dan Keupayaan Pertahanan dalam Melindungi Kepentingan Negara serta Mengukuhkan Kapasiti Pertahanan Negara yang Kompeten. Program dan aktiviti di bawah teras Pelan Strategik MINDEF ini turut dilaksanakan melalui kolaborasi strategik dengan negara-negara serantau dan luar rantau melalui Diplomasi Pertahanan di bawah platform ASEAN dan Aturan Pertahanan Lima Negara (FPDA). Malaysia sentiasa bersedia meningkatkan kapasiti pertahanan negara dari semasa ke semasa.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TENGKU ZULPURI BIN RAJA PUJI [RAUB]

TARIKH : 16 NOVEMBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan adakah pihak Kementerian telah mewujudkan satu badan atau agensi kreatif berasaskan sains dan teknologi terkini dalam menghadapi situasi pandemik COVID-19 seperti teknologi baru bagi mengesahkan penyakit COVID-19 dengan cepat dan serta kos yang murah selain daripada cara pengujian dengan air liur.

JAWAPAN

Tuan Yang di-Pertua,

Terima kasih kepada Ahli Yang Berhormat Raub atas soalan yang dikemukakan.

Untuk makluman Yang Berhormat, dalam menghadapi situasi pandemik COVID-19 sejak tahun 2020, Kementerian Sains, Teknologi dan Inovasi telah melaksanakan pelbagai perkara berasaskan sains dan teknologi meliputi tiga (3) perkara utama:

1. Penubuhan Pusat Vaksin Negara;
2. Pembiayaan penyelidikan dan pembangunan atau R&D untuk dilaksanakan penjujukan genom yang bertujuan memerangi dan mengawal wabak COVID-19; dan

3. Penambahbaikan kepada empat (4) perkara utama berasaskan sains dan teknologi iaitu pembangunan sistem pengesanan kontak, *Vaccine Management System*, *Vaccine Certificate Verifier* dan aplikasi autopsi digital.

Pertama: Penubuhan Pusat Vaksin Negara

Kerajaan telah menubuhkan pusat vaksin negara dengan menaiktaraf Institut Genom Malaysia (MGI) kepada Institut Genom dan Vaksin Malaysia (MGVI) dengan tujuan untuk membangunkan vaksin tempatan dan menjamin keselamatan kesihatan (*health security*) negara pada masa hadapan.

MGVI ini telah dilancarkan pada 1 November 2021 oleh YAB Perdana Menteri Malaysia. Susulan perkara ini, MOSTI akan terus komited memperkasa penyelidikan dan pembangunan atau R&D vaksin dalam negara sebagai salah satu langkah pengurusan pandemik COVID-19 negara.

Kedua: Pembiayaan dana penyelidikan dan pembangunan atau R&D untuk dilaksanakan penjujukan genom yang bertujuan memerangi dan mengawal wabak COVID-19

Pada bulan April tahun 2021, MOSTI telah menyalurkan dana penyelidikan strategik (*Strategic Research Fund*) kepada konsortium *genomic surveillance* yang terdiri daripada MGVI, UNIMAS, IMR, UKM, UiTM dan UM sebanyak 3.22 juta ringgit untuk melakukan 3000 penjujukan genom SARS-CoV-2.

Sehingga kini, sebanyak 3,210 penjujukan genom telah dilakukan, menjadikan jumlah penjujukan genom dari Malaysia sebanyak 4,866.

State	Cases*	Genomes
Johor	224,334	252
Kedah	153,487	70
Kelantan	146,925	109
Melaka	68,024	94
Negeri Sembilan	105,620	153
Pahang	81,220	153
Perak	119,222	34
Perlis	5,911	26
Pulau Pinang	148,703	210
Sabah	225,360	132
Sarawak	247,380	1,928
Selangor	731,765	355
Terengganu	72,812	49
WP Kuala Lumpur	197,667	433
WP Labuan	10,220	8
WP Putrajaya	7,659	5
Unknown	-	855
TOTAL	2,546,309	4,866

Kemudian, MOSTI akan menyalurkan peruntukan tambahan sekitar 13.98 juta ringgit kepada konsortium ini untuk melakukan lagi 10,000 penjujukan genom bagi meningkatkan lagi kapasiti *genomic surveillance* negara agar kita sentiasa dapat gambaran sebenar varian-varian virus SARS-CoV-2 yang ada dalam negara.

Sebagai contoh, pada 6 November 2021, KKM telah mengesan dua kes pertama COVID-19 di negara ini yang dijangkiti Subvarian Delta AY.4.2 yang mana telah dijumpai oleh konsortium ini. Penemuan varian seperti Subvarian AY.4.2 ini adalah penting kerana Agensi Keselamatan Kesihatan UK telah meletakkannya sebagai *Variant Under Investigation* (VUI). MOSTI komited untuk memberi sokongan dan dana kepada konsortium ini agar kita terus memantau situasi varian di dalam negara agar kerajaan dapat membuat keputusan yang tepat dalam pandemik ini.

Ketiga: Penambahbaikan kepada empat (4) perkara utama berasaskan sains dan teknologi

Perkata Pertama: Pembangunan sistem pengesanan kontak

Penambahbaikan kepada sistem ini telah dilaksanakan menerusi MIMOS, iaitu:

1. Penggunaan teknologi *bluetooth* dan GPS dalam aplikasi MySejahtera serta akses kepada data tersedia dalam MySejahtera bagi membantu proses pengesanan kontak yang lebih berkesan;
2. Selain itu, penggunaan *Bluetooth Dongle* dalam kalangan individu yang tidak memiliki telefon pintar sebagai contohnya di kalangan warga emas dan kumpulan B40 juga sedang dipertimbangkan. Walau bagaimanapun, pelaksanaan perkara ini akan mengambil kira isu *data privacy* dan spesifikasi protokol bagi membolehkan *interoperability* dengan MySejahtera. Selain itu, pelaksanaannya juga akan melibatkan pembangunan spesifikasi dan pengujian peranti sebelum boleh digunakan.

Kedua: Pembangunan *Vaccine Management System*

Seterusnya, MOSTI telah membangunkan *Vaccine Management System* bagi tujuan penyimpanan rekod data vaksinasi melalui teknologi *blockchain* yang dapat menjana sijil vaksinasi bagi setiap penerima vaksin.

Ketiga: *Vaccine Certificate Verifier*

Sebagai langkah memastikan sijil digital vaksin COVID-19 adalah tulen, setiap sijil akan mempunyai Kod QR dan boleh disahkan ketulenan melalui aplikasi *Vaccine Certificate Verifier* yang juga telah dibangunkan oleh MIMOS.

Keempat: Aplikasi Autopsi Digital

Aplikasi ini telah dibangunkan oleh Syarikat iGene berdasarkan teknologi Realiti Maya dan Realiti Terimbuh (VR/AR) serta disokong dengan teknologi kecerdasan buatan (AI) dan analisis data raya (BDA).

Pembiayaan projek ini diterima daripada *Malaysia Venture Capital Management* (MAVCAP), sebuah agensi di bawah MOSTI bagi memperkasakan syarikat teknologi tempatan.

Aplikasi ini amat relevan dalam *crime scene documentation* atau *investigation* yang memerlukan sentuhan minima terutama dalam situasi pandemik COVID-19. *Digital autopsy* terdiri daripada komponen patologi digital dan pembedahan digital ini mencapai 90% ketepatan dalam penilaian punca kematian (*Cause of Death*) dan telah digunakan di United Kingdom.

Seterusnya, merujuk kepada persoalan mengenai teknologi baru bagi mengesahkan penyakit COVID-19 dengan cepat dan kos yang murah selain daripada cara pengujian dengan air liur.

Kaedah saringan COVID-19 melalui peranti *i-Breath*

MOSTI menerusi **Pusat Nanoteknologi Kebangsaan (NNC)** dan **Institut Bioteknologi Kebangsaan Malaysia (NIBM)** telah membantu pasukan penyelidik daripada **Universiti Teknologi Malaysia (UTM)** mengenalpasti kaedah saringan COVID-19 yang lebih mudah, murah dan pantas. Kaedah tersebut dilaksanakan melalui peranti yang diberi nama ***i-Breath***. Ia merupakan alat pengesan COVID-19 melalui profil pernafasan individu yang telah dibangunkan oleh penyelidik tempatan. Kementerian telah meluluskan pembiayaan dana penyelidikan bagi meneruskan pembangunan prototaip *i-Breath* ini beserta kajian klinikal yang lebih lanjut.

Penerangan mengenai *i-Breath*:

- Pesakit hanya perlu bernafas seperti biasa pada alat '*nose prong*' yang diletakkan di hidung;
- Peranti akan membuat analisa *capnogram*, iaitu menyukat kepekatan serta pola gas karbon dioksida yang dihembus keluar dan sistem kecerdasan buatan atau *artificial intelligence*, ringkasnya AI, dapat memberikan keputusan sepantas 20 saat sahaja;

- Sistem ini tidak memerlukan petugas kesihatan yang terlatih serta mampu membezakan antara pesakit Covid-19, *Severe Acute Respiratory Illness* atau SARI, *Chronic Obstructive Pulmonary* atau COPD dan juga pesakit yang menghidap *asthma*.

Kajian klinikal awal telah dijalankan di tiga (3) buah hospital iaitu Hospital Pulau Pinang, Hospital Seberang Jaya dan Pusat Perubatan Universiti Malaya (PPUM) telah menunjukkan peranti ini berupaya mengenalpasti pesakit COVID-19 dengan tahap *specificity* 94% dan *sensitivity* 93%. Ciri tambahan yang sedang cuba dibuktikan ialah keupayaan peranti ini untuk membezakan tahap pesakit COVID-19, iaitu daripada kategori 1 hingga ke kategori 5. Produk ini dijangka sedia untuk dipasarkan seawal suku ketiga pada tahun 2022.

Untuk makluman Yang Berhormat juga, Singapura telah mula memasarkan peranti yang dapat mengesan jangkitan COVID-19 melalui hembusan nafas. Peranti tersebut diberi nama '*BreFence™ Go COVID-19 Breath Test System*'. Melalui peranti ini, analisa kualitatif akan dibuat berdasarkan *volatile organic compounds* dalam hembusan nafas. Keputusan dikatakan mampu diperolehi dalam tempoh 60 saat dengan tahap *specificity* 97% dan *sensitivity* 85%.

Tuan Yang di-Pertua,

Kaedah saringan COVID-19 melalui corak bunyi batuk pesakit

Seterusnya, MOSTI menerusi sekretariat **Sandbox Inovasi dan Teknologi Nasional (NTIS)** sedang membantu sebuah syarikat tempatan iaitu Serba Dinamik IT Solutions Sdn. Bhd. membangunkan produk saringan awal COVID-19 melalui corak bunyi batuk pesakit.

Berdasarkan konsep 'plug-and-play', pengguna hanya perlu memuat turun aplikasi berkenaan ke dalam telefon bimbit masing-masing dan merakamkan bunyi 'batuk' sebanyak tiga kali berturut-turut.

Untuk tujuan pengesahan, aplikasi ini turut dilengkapi sistem '*facial recognition*' bagi mengenalpasti identiti pengguna. Keputusan saringan dapat diterima dalam tempoh 30 saat.

Seterusnya, pengguna yang positif dinasihatkan supaya menjalani ujian saringan menggunakan kaedah RT-PCR atau RTK Ag untuk pengesahan.

Pada dasarnya, aplikasi ini telah sedia dibangunkan. Walau bagaimanapun, perbincangan lanjut masih diadakan antara pelbagai pihak sebelum produk ini boleh digunakan dengan meluas.

Kesimpulan

Sebagai kesimpulan, kedua-dua produk tersebut adalah hasil usaha rakyat tempatan yang berupaya menawarkan penyelesaian mudah, murah dan pantas serta berpotensi diterapkan sebagai SOP saringan awal COVID-19 pada masa depan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD TARMIZI BIN
SULAIMAN [SIK]**

TARIKH : 16 NOVEMBER 2021 (SELASA)

SOALAN:

Minta **PERDANA MENTERI** menyatakan syarat kelayakan dan keterbukaan pelantikan pegawai perkhidmatan awam pelbagai bidang mengetuai jabatan di Kementerian dan agensi dalam kalangan Pegawai Tadbir dan Diplomatik (PTD) dan bukan PTD.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Kenaikan pangkat dan penempatan seseorang pegawai awam terutama bagi mengisi jawatan strategik seperti mengetuai sesebuah jabatan atau agensi Kerajaan akan dilaksanakan berdasarkan merit. Dalam mempertimbangkan merit seseorang pegawai, Lembaga Kenaikan Pangkat mengambil kira perkara-perkara seperti berikut:

- a) kecekapan dan prestasi kerja;
- b) kelayakan, pengetahuan, kemahiran dan pengalaman;
- c) sifat-sifat peribadi, termasuk kesesuaiannya dengan jawatan kenaikan pangkat itu, potensi dan kepimpinan; dan
- d) kegiatan luar dan sumbangan pegawai kepada negara dan masyarakat.

2. Selain itu, seseorang pegawai hanya boleh dipertimbangkan bagi kenaikan pangkat jika pegawai tersebut telah mematuhi semua syarat yang dinyatakan dalam skim perkhidmatannya dan terdapat kekosongan dalam jawatan kenaikan pangkat itu.

3. Berdasarkan status pengisian perjawatan dalam HRMIS Jabatan Perkhidmatan Awam (JPA) pada 17 Oktober 2021, bilangan pegawai dalam Kumpulan Pengurusan Tertinggi di Kementerian dan Jabatan Persekutuan adalah seramai 4,093 orang. Daripada jumlah tersebut, seramai 601 orang (14.68%) adalah daripada skim Perkhidmatan Tadbir dan Diplomatik (PTD), manakala seramai 3,492 orang (85.32%) adalah daripada lain-lain skim perkhidmatan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 16 NOVEMBER 2021 (SELASA)

SOALAN :

**TUAN WILLIAM LEONG JEE KEEN [SELAYANG] minta PERDANA
MENTERI menyatakan :-**

- (a) kriteria untuk Peguam Negara mendakwa kes-kes jenayah; dan
- (b) sebab-sebab bagi pihak pendakwa menarik balik pertuduhan terhadap tertuduh dalam kes-kes profil tinggi atau membenarkan tertuduh dilepaskan sejak 1 Mac 2020.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(A) Kriteria Untuk Peguam Negara Mendakwa Kes-Kes Jenayah

Untuk makluman Ahli Yang Berhormat, apabila kertas siasatan dikemukakan oleh Pegawai Penyiasat kepada Pendakwa Raya, Pendakwa Raya perlu meneliti sama ada bukti dan keterangan yang dikumpulkan dalam kertas siasatan itu mencukupi untuk memenuhi elemen kesalahan dan mengemukakan pertuduhan terhadap suspek di mahkamah.

Justeru, tidak ada kriteria tertentu atau mutlak yang mesti dipenuhi kerana ia sememangnya bergantung kepada latar belakang dan keterangan yang wujud bagi sesuatu kes, atas dasar *case-to-case basis*.

(B) Sebab-Sebab Bagi Pihak Pendakwa Menarik Balik Pertuduhan Terhadap Tertuduh Dalam Kes-Kes Profil Tinggi Atau Membenarkan Tertuduh Dilepaskan Sejak 1 Mac 2020

Apabila membuat keputusan untuk menarik balik pertuduhan, penilaian dibuat atas dasar *case-to-case basis*. Kebiasaannya, pihak pendakwaan mempertimbangkan sama ada terdapat representasi yang dikemukakan oleh tertuduh atau tidak dan sama ada representasi itu mempunyai merit untuk dipertimbangkan.

Selain itu, pendakwaan turut menilai semula semua keterangan yang telah dan akan dikemukakan ke mahkamah sama ada ia mencukupi atau tidak dalam memenuhi elemen kesalahan yang dipertuduhkan. Penilaian keterangan dan apa-apa fakta baharu yang kredibel atau timbulnya fakta baharu semasa perbicaraan akan diteliti sebelum perbicaraan bermula dan semasa perbicaraan dijalankan.

NO. SOALAN : 32

Semasa mengendalikan perbicaraan di mahkamah, pihak pendakwaan turut berhadapan dengan masalah saksi yang antara lain tidak hadir ke mahkamah, meninggal dunia atau hilang yang sekali gus akan mengganggu rantai keterangan kes pendakwaan.

Terdapat juga keadaan yang melibatkan pengadu melarikan diri, atau saksi memberikan keterangan yang tidak sama dengan keterangan yang pernah direkodkan sebelum ini semasa proses siasatan dijalankan.

Pihak pendakwaan tidak dengan sewenang-wenangnya menarik balik pertuduhan jika tiada asas yang munasabah untuk berbuat demikian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 16 NOVEMBER 2021 (SELASA)

SOALAN

Minta **PERDANA MENTERI** menyatakan berapa jumlah kehilangan pendapatan negara dari sudut ekonomi dan pelancongan akibat penutupan sempadan dengan Singapura setakat bulan September 2021 dan bilakah sempadan tersebut akan dibuka dan apakah sebab utamanya sekiranya ianya tidak dibuka pada masa yang terdekat.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Pertimbangan pembukaan sempadan negara adalah tertakluk kepada penilaian risiko oleh Kementerian Kesihatan Malaysia (KKM) serta perbincangan yang dibuat bersama negara-negara berkaitan. Sehingga kini, masih terdapat varian-varian baru COVID-19 yang menular dengan pantas sehingga mendatangkan cabaran yang besar kepada mana-mana negara termasuk Malaysia untuk mempertimbangkan pembukaan sempadannya dalam masa terdekat.
2. Sebelum pandemik COVID-19 melanda, Singapura merupakan pasaran utama pelancong ke Malaysia, iaitu mewakili hampir 40% daripada jumlah keseluruhan ketibaan pelancong. Pada tahun 2020,

ketibaan pelancong dari Singapura merosot sebanyak 84.8% daripada 10.1 juta orang pelancong kepada hanya 1.5 juta orang pelancong. Perbelanjaan pelancong Singapura turut jatuh sebanyak 86.8% iaitu daripada RM20.5 bilion kepada RM2.7 bilion pada tahun 2020. Bagi tempoh Januari hingga Jun 2021, Malaysia hanya menerima seramai 1,591 ketibaan pelancong dari Singapura, dengan anggaran pendapatan sebanyak RM2.5 juta.

3. Pada masa ini, sempadan antarabangsa melalui jalan darat antara Malaysia dan Singapura hanya dibuka untuk pengembara yang memohon di bawah skim *Periodical Commuting Arrangement* (PCA) iaitu satu skim yang khusus bagi memudahkan perjalanan rentas sempadan untuk golongan pekerja.

4. Kerajaan turut menerima pelawat perniagaan dari Singapura melalui pelaksanaan skim *One Stop Centre* (OSC) di Pintu Masuk Antarabangsa (PMA) KLIA yang terbahagi kepada dua kategori iaitu Pelawat Perniagaan Jangka Pendek (kurang dari 14 hari) dan Jangka Panjang (melebihi 14 hari).

5. Pihak Kementerian Luar Negeri (KLN) bersama-sama dengan Kementerian Kesihatan Malaysia (KKM) dan Kerajaan Negeri Johor juga sedang dalam usaha untuk mengemukakan cadangan kepada pihak Kerajaan Singapura mengenai Prosedur Operasi Standard (SOP) bagi *Daily Commuting Arrangement* (DCA) untuk pengembara yang lengkap vaksinasi COVID-19. Pada masa yang sama, kita juga sedang mengadakan perbincangan berkenaan pembukaan skim *Vaccinated Travel Lane* (VTL) melalui perjalanan udara yang tiba di PMA KLIA dan perjalanan darat di Tambak Johor.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SAIFUDDIN NASUTION BIN
ISMAIL (KULIM BANDAR BAHARU)**

TARIKH : 16 NOVEMBER 2021(SELASA)

SOALAN

Minta **MENTERI KANAN PERTAHANAN** menyatakan implikasi Pakatan Keselamatan tiga negara Amerika Syarikat, United Kingdom dan Australia (AUKUS) terhadap Malaysia dan ASEAN dari sudut keselamatan, pertahanan dan hubungan ketenteraan antarabangsa.

JAWAPAN

Tuan Yang Dipertua,

Seperti yang dinyatakan sebelum ini, pendirian Kerajaan Malaysia berhubung AUKUS tetap konsisten seperti yang ditegaskan oleh YAB Perdana Menteri, yang mana pembentukan AUKUS melahirkan kegusaran kerana ia berpotensi mengganggu gugat keamanan dan kestabilan di Asia Tenggara. Selain itu, ia juga bakal memprovokasi kuasa-kuasa lain untuk turut bertindak lebih agresif di rantau ini terutama di Laut China Selatan.

Malaysia sebagai salah satu negara peneraju ASEAN berpegang teguh kepada prinsip Zon Aman, Bebas dan Berkecuali (Zone of Peace, Freedom and Neutrality, ZOPFAN) dan menyeru agar semua negara anggota ASEAN untuk terus bersatu di bawah ASEAN. Malaysia sentiasa berpendirian bahawa sebarang isu melibatkan hubungan antarabangsa perlu diselesaikan secara aman melalui rundingan dan semua pihak mesti menghormati undang-undang antarabangsa.

Walaupun AUKUS ini tidak menyatakan sebarang elemen penggunaan senjata nuklear, Malaysia sentiasa menekankan prinsip untuk mengekalkan ASEAN sebagai zon bebas senjata nuklear berdasarkan Perjanjian Zon Bebas Senjata Nuklear Asia Tenggara (Southeast Asia Nuclear Weapon Free Zone – SEANWFZ) yang dipersetujui oleh semua negara ASEAN pada tahun 2001. Kedua-dua komitmen ini telah menjelaskan pendirian Malaysia yang konsisten untuk menolak apa jua bentuk tindakan berbentuk provokasi yang bakal menyumbang kepada persaingan senjata di rantau ini.

Isu penubuhan kerjasama tiga hala Australia, United Kingdom dan Amerika Syarikat perlu juga dilihat secara positif yang mana perkembangan ini boleh mewujudkan peluang (*opportunity*) kepada Malaysia untuk meningkatkan lagi kapasiti pertahanan bagi menghadapi lanskap keselamatan yang sentiasa dinamik.

Malaysia sentiasa memandang ke hadapan bagi memastikan keselamatan dan kedaulatan negara tidak diganggu gugat. Hubungan (diplomasi pertahanan) sedia ada dengan negara-negara ASEAN umpamanya akan terus diperkukuhkan. Melalui satu suara 10 negara ASEAN adalah sukar bagi kuasa-kuasa besar untuk menjejaskan kestabilan Malaysia dan rantau ini secara keseluruhan.

Dari sudut hubungan antarabangsa pula, Malaysia berpegang kepada prinsip negara berkecuali yang sentiasa mengutamakan hubungan yang baik dengan semua negara. Kerajaan akan terus menjalinkan kerjasama pertahanan dua hala dan pelbagai hala dengan negara-negara di Asia Tenggara dan negara-negara kuasa besar seperti Amerika Syarikat dan Republik Rakyat China. Namun, ingin ditegaskan disini bahawa hubungan baik dengan mana-mana negara tidak akan menjejaskan atau mencemar kedaulatan negara. Malaysia sentiasa bersedia untuk menghadapi sebarang kemungkinan kesan daripada pakatan tiga negara Amerika Syarikat, United Kingdom dan Australia (AUKUS).

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATUK ZAKARIA BIN MOHD
EDRIS@TUBAU (LIBARAN)**

TARIKH : 16 NOVEMBER 2021 (SELASA)

SOALAN

DATUK ZAKARIA BIN MOHD EDRIS@TUBAU [LIBARAN] minta **MENTERI KANAN KERJA RAYA** menyatakan bagaimanakah Kementerian memainkan peranannya dalam merealisasikan WKB2030, Keluarga Malaysia dan Aspirasi 100 Hari Pentadbiran Jemaah Menteri di alaf pasca COVID-19.

JAWAPAN

Tuan Yang di-Pertua,

Untuk makluman Ahli Yang Berhormat, semua inisiatif dan dasar yang dibangunkan oleh Kementerian Kerja Raya (KKR) adalah berpandukan kepada agenda semasa Kerajaan. Sebagai Kementerian yang menerajui pembangunan infrastruktur negara, aspek kesejahteraan rakyat sentiasa diambil kira dalam apa jua pelaksanaan projek dan inisiatif.

Bagi merealisasikan WKB2030, Keluarga Malaysia dan Aspirasi 100 Hari Pentadbiran Jemaah Menteri di alaf pasca COVID-19 ini, KKR akan terus meningkatkan usaha serta memperkasakan sistem penyampaian perkhidmatan melalui pendekatan-pendekatan yang lebih berstruktur bersama-sama agensi dan pihak-pihak yang terlibat. Pelaksanaan inisiatif-inisiatif bagi setiap aspirasi adalah berlandaskan dua (2) Teras Utama dari enam (6) yang telah ditetapkan oleh kerajaan iaitu di bawah Teras 1 : Menstruktur Semula Ekonomi dan Teras 4 : Mempertingkatkan Infrastruktur Menyeluruh. Selain program-program bersifat people centric dan berimpak tinggi dalam usaha memulihkan industri pembinaan dan rantaian ekonomi dibawahnya dalam tempoh 100 hari ini, kita juga menetapkan beberapa sasaran jangka sederhana dan panjang. Setiap inisiatif dan sasaran akan dipantau dengan teliti supaya dapat dicapai seperti yang ditetapkan agar rakyat khususnya Keluarga Malaysia mendapat manfaatnya.

Sebagai contoh, Dasar Pembinaan Negara 2030 (NCP 2030) yang telah dilancarkan pada 9 November 2021 yang lalu dibangunkan dengan hasrat untuk menyokong WKB2030 melalui teras-teras yang berpaksikan kepentingan rakyat dan penggiat industri. Ini termasuklah untuk menyedia dan menambah lebih infrastruktur berkualiti dan inklusif melalui pembangunan menyeluruh dan berstruktur di seluruh negara bagi setiap peringkat masyarakat demi meningkatkan indeks kesejahteraan sosial. NCP 2030 turut memfokuskan kepada digitalisasi dan aplikasi teknologi

dalam usaha untuk memperkasa modal insan dengan tenaga kerja mahir seperti mana yang digariskan dalam Rancangan Malaysia Ke-12.

Selain itu, dalam meningkatkan jaminan keselamatan rakyat terutamanya di tapak bina, Kementerian Kerja Raya melalui Lembaga Pembangunan Industri Pembinaan (CIDB) Malaysia sedang meneliti beberapa Standard Industri Pembinaan (CIS) yang boleh dijadikan sebagai peraturan bagi memperkukuh dan memperkasa penguatkuasaan prosedur kerja selamat. Inisiatif ini diharap akan dapat mengurangkan kadar kemalangan melibatkan pekerja tapak bina dan orang awam melalui penguatkuasaan undang-undang dan peraturan yang lebih ketat.

KKR sentiasa komited dalam melaksanakan segala aspirasi dan wawasan negara agar ia tercapai dengan jayanya dan rakyat boleh menikmati faedah serta kesejahteraan amnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATUK MOHAMADDIN BIN KETAPI
[LAHAD DATU]**

TARIKH : 16 NOVEMBER 2021 (SELASA)

SOALAN

DATUK MOHAMADDIN BIN KETAPI [LAHAD DATU] minta **KEMENTERIAN PERDAGANGAN ANTARABANGSA DAN INDUSTRI** menyatakan potensi pelaburan di Lahad Datu dan usaha-usaha yang dibuat Kementerian bagi menarik minat pelabur asing ke sini.

JAWAPAN

Tuan Yang di-Pertua,

Dimaklumkan bahawa dari tahun 1980 sehingga tahun 2020, jumlah pelaburan yang telah diluluskan dan dilaksanakan di Lahad Datu khususnya adalah sebanyak RM2.5 bilion, terdiri daripada 66 buah projek dalam sektor perkilangan yang mana ianya menjana 5,402 peluang pekerjaan. Daripada jumlah tersebut, RM1.1 bilion atau 44 peratus adalah merupakan pelaburan langsung asing dan RM1.4 bilion atau 56 peratus merupakan pelaburan tempatan. Projek-projek utama yang dilaksanakan dengan penglibatan pelaburan asing dan tempatan adalah di dalam industri kimia dan barangan kimia, pengilangan makanan, kayu dan barangan kayu.

Kementerian Perdagangan Antarabangsa dan Industri (MITI) mendapati bahawa industri-industri yang berpotensi untuk dibangunkan di Lahad Datu adalah seperti berikut:

- i. industri hiliran kelapa sawit, biojisim dan biogas. Sektor ini berpotensi untuk memberikan impak yang besar ke atas pembangunan di Lahad Datu berikutan kedudukan *Palm Oil Industrial Cluster* (POIC) yang terletak di sana. POIC merupakan pusat penanaman kelapa sawit di Sabah dengan keluasan sekitar 1.55 juta hektar dan lokasi kepada 128 buah kilang kelapa sawit dan berfungsi sebagai pemangkin dalam pertumbuhan industri minyak sawit di rantau ini;
- ii. aktiviti berkaitan pelabuhan dan logistik. Lahad Datu mempunyai kemudahan zon perdagangan bebas, *bonded warehouse*, tempat penyimpanan sejuk beku, pemprosesan makanan, serta penampungan minyak dan gas. Selain daripada itu, terdapat juga kemudahan pelabuhan bersepadu di POIC yang terdiri daripada Terminal Pukal Kering, Terminal Pukal Cecair, Terminal Kontena, Dermaga Tongkang dan Terminal Pukal;

- iii. industri petrokimia seperti kilang penapisan, penyimpanan dan pengedaran minyak. Lahad Datu mempunyai kemudahan pelabuhan bersepadu di POIC seperti terminal cecair, kering, kontena dan tongkang yang dapat memudahkan pengendalian pelbagai jenis kargo dalam sektor industri petrokimia. Selain daripada itu, kawasan POIC yang luas dapat memenuhi permintaan industri pada masa hadapan, sama ada bagi tujuan pembesaran pelabuhan atau kilang dan sebagainya; dan
- iv. industri halal. POIC Lahad Datu telah diiktiraf sebagai taman perindustrian pertama berstatus HALMAS di Sabah yang telah siap dibangunkan, bersedia untuk menerima industri yang berasaskan halal. Selain daripada itu, kedudukannya juga berdekatan dengan pelabuhan kontena memudahkan aktiviti pengimportan dan pengeksportan.

Kerajaan melalui MITI, Lembaga Pembangunan Pelaburan Malaysia (MIDA), dan Perbadanan Pembangunan Perdagangan Luar Malaysia (MATRADE) sentiasa bekerjasama secara strategik dengan pihak kerajaan negeri dan agensi-agensi yang berkaitan bagi melipat gandakan usaha-usaha promosi pelaburan, antaranya seperti berikut:

- i. memperkenalkan Dasar Pelaburan Baharu Negara Berteraskan Aspirasi Pelaburan Negara (*National Investment Aspirations - NIA*) yang merupakan pendekatan berfokus dan bersasar dalam merencanakan agenda pelaburan nasional Negara secara holistik ke arah negara maju dan berpendapatan tinggi;
- ii. menganjurkan misi perdagangan dan pelaburan ke luar negara bagi berkongsi maklumat dan memaklumkan kepada bakal pelabur tentang peluang pelaburan dalam sektor-sektor yang disasarkan melalui pendekatan ekosistem;
- iii. mengoptimumkan fasilitasi pelaburan melalui penubuhan *Project Acceleration and Coordination Unit* (PACU) di MIDA dalam membantu mempercepatkan kelulusan daripada pelbagai agensi dan pemantauan pelaksanaan projek pelaburan di pelbagai peringkat. Antaranya ialah proses kelulusan lesen

pengilang untuk industri tidak sensitif yang disingkatkan kepada dua (2) hari bekerja sahaja; dan

- iv. menawarkan insentif galakan pelaburan berbentuk fiskal dan bukan fiskal secara selektif dalam mempromosikan industri strategik yang disasarkan di dalam Rancangan Malaysia Kedua Belas, 2021-2025 (RMKe-12), iaitu tiga (3) subsektor pemangkin (kimia; elektrik dan elektronik; serta mesin dan peralatan) dan dua (2) sektor berpotensi tinggi (peranti perubatan dan aeroangkasa).

Tuan Yang di-Pertua,

Kerajaan akan terus berusaha bagi menarik pelaburan langsung asing dan domestik yang berkualiti tinggi ke seluruh negeri di Malaysia yang turut mewujudkan peluang pekerjaan, membangunkan tenaga kerja yang mahir dan memupuk pertumbuhan syarikat-syarikat tempatan. Usaha ini dapat mempercepatkan pemulihan, meningkatkan pertumbuhan ekonomi negara serta memastikan Malaysia kekal sebagai destinasi pilihan pelabur.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN KHALID BIN ABD SAMAD
[SHAH ALAM]**

TARIKH : 16 NOVEMBER 2021 (SELASA)

SOALAN

TUAN KHALID BIN ABD SAMAD [SHAH ALAM] minta **PERDANA MENTERI** menyatakan keberkesanan Seksyen 17A Akta Suruhanjaya Pencegahan Rasuah 2009 dalam mencegah masalah korupsi dalam negara terutamanya dalam sektor korporat.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, seksyen 17A Akta Suruhanjaya Pencegahan Rasuah Malaysia 2009 (Akta 694) telah dikuatkuasakan pada 1 Jun 2020. Sejak dikuatkuasakan Suruhanjaya Pencegahan Rasuah Malaysia (SPRM) telah mengadakan taklimat pelaksanaan inisiatif anti rasuah seksyen 17A Akta 694 kepada 186 agensi dengan penglibatan seramai 556 peserta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 16 NOVEMBER 2021 (SELASA)

SOALAN

TUAN LIM KIT SIANG [ISKANDAR PUTERI] minta **PERDANA MENTERI** menyatakan Laporan Majlis Penasihat Kerajaan yang diserahkan kepada Perdana Menteri ke-7 sebelum ini dan sama ada Kerajaan berhasrat untuk membentangkan laporan tersebut ke Parlimen.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Majlis Penasihat Kerajaan atau *Council Of Eminent Persons* (CEP) telah diumumkan penubuhannya pada 12 Mei 2018 oleh Kerajaan Pakatan Harapan dan mereka telah tamat melaksanakan tugas pada 19 Ogos 2018. Matlamat utama penubuhan Majlis ini adalah untuk menasihatkan Kerajaan dalam bidang ekonomi, kewangan serta bidang-bidang lain yang perlu diberi perhatian mengikut keadaan semasa ketika itu.
2. CEP hanya berperanan sebagai badan penasihat yang tidak mempunyai kuasa atau peruntukan di bawah Perlembagaan ataupun undang-undang negara. Ini bermakna, Kerajaan sama sekali tidak terikat untuk menerima cadangan-cadangan yang dikemukakan oleh CEP.
3. Pada masa ini, Kerajaan telahpun mempunyai perancangan tersendiri untuk pelan pemulihan ekonomi negara melalui Rancangan Malaysia Ke-12 yang berteraskan semangat Keluarga Malaysia. Justeru, Kerajaan tidak berhasrat membentangkan laporan CEP tersebut ke Parlimen.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 16 NOVEMBER 2021(SELASA)

SOALAN

Minta **MENTERI KANAN PERTAHANAN** menyatakan dan senaraikan aset-aset ketenteraan, yang nilainya melebihi RM1 juta seunit yang telah ditempah, dibayar sepenuhnya oleh Kerajaan tetapi belum diterima semuanya oleh Kerajaan, dalam tempoh tahun 2010 hingga 2020.

JAWAPAN

Tuan Yang di-Pertua,

Tiada sebarang aset ketenteraan yang melebihi nilai RM1 juta seunit yang telah ditempah dan dibayar sepenuhnya tetapi belum diterima oleh Kerajaan dalam tempoh tahun 2010 sehingga 2020. Pembayaran penuh hanya akan dibuat apabila semua aset telah diterima dan melalui proses *Final Acceptance Test* di peringkat perkhidmatan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L
KARPAL SINGH [BUKIT GELUGOR]**

TARIKH : 16 NOVEMBER 2021 (SELASA)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **PERDANA MENTERI** menyatakan sama ada Kerajaan bersetuju untuk menubuhkan Suruhanjaya Siasatan Diraja (RCI) bagi menyiasat dakwaan Peguam Negara terdahulu, Tan Sri Tommy Thomas, antara lainnya, berkenaan institusi kehakiman seperti mana yang dilaporkan oleh media massa pada 28 Ogos 2021 dan sekiranya ya, sama ada RCI tersebut akan juga meliputi pendedahan oleh bekas Hakim Mahkamah Rayuan Hamid Sultan Abu Backer.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Jemaah Menteri telah bersetuju untuk menubuhkan satu Pasukan Petugas Khas Siasatan bagi membuat semakan dan kajian awal sebelum sebarang tindakan seterusnya diambil terhadap dakwaan bekas Peguam Negara, Tan Sri Tommy Thomas dalam bukunya “My Story: Justice in the Wilderness” mengenai penyalahgunaan kuasa dalam isu pelantikan hakim, campur tangan badan eksekutif melampau dalam badan kehakiman, pendakwaan terpilih dan bersifat politik serta pelanggaran sumpah kerahsiaan.

Pasukan Petugas Khas Siasatan ini nanti akan dipengerusikan oleh seorang bekas Presiden Mahkamah Rayuan yang akan dilantik dalam masa terdekat. Bahagian Hal Ehwal Undang-Undang, Jabatan Perdana Menteri dan Jabatan Peguam Negara akan bertindak sebagaiurus setia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 16 NOVEMBER 2021 (SELASA)

SOALAN

TUAN SU KEONG SIONG [KAMPAR] minta **PERDANA MENTERI** menyatakan status terkini dan pelaksanaan Undi-18, Undang-Undang Anti-Lompat Parti dan mengehadkan tempoh jawatan Perdana Menteri tidak melebihi 10 tahun sepertimana yang termeterai dalam Memorandum Persefahaman bertarikh 13 September 2021.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan sentiasa memberikan komitmen sepenuhnya untuk memastikan perkara-perkara yang dimeterai dalam Memorandum Persefahaman Transformasi dan Kestabilan Politik antara Kerajaan Persekutuan dan Pakatan Harapan pada 13 September 2021 dilaksanakan dan dijayakan dalam tempoh yang ditetapkan. Antara perkara-perkara tersebut termasuklah pelaksanaan Undi-18, Rang Undang-Undang (RUU) Anti-Lompat Parti dan mengehadkan tempoh jawatan Perdana Menteri tidak melebihi 10 tahun.

Suruhanjaya Pilihan Raya (SPR) sedang dalam persiapan untuk melaksanakan pindaan Perkara 119 Perlembagaan Persekutuan iaitu berhubung umur kelayakan pengundi 18 tahun dan pendaftaran pemilih secara automatik sebagaimana yang diluluskan oleh Parlimen pada Mesyuarat Kedua Penggal Kedua Parlimen Keempat Belas seperti berikut:

Dewan Rakyat	16 Julai 2019
Dewan Negara	25 Julai 2019

Persiapan yang sedang dilaksanakan oleh SPR bagi pelaksanaan umur kelayakan pengundi 18 tahun dan pendaftaran pemilih secara automatik adalah meliputi:

- (i) pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan;
- (ii) penyediaan *standard operating procedures* (SOP); dan
- (iii) penyediaan sistem serta infrastruktur.

Di samping itu, SPR juga telah mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik seperti berikut:

- (i) membuat semakan maklumat bakal pemilih;
- (ii) membuat semakan di lapangan yang melibatkan bakal pengundi berumur 90 tahun dan ke atas;
- (iii) semakan di lapangan ke atas alamat untuk memastikan penentuan bahagian pilihan raya yang tepat;
- (iv) sesi libat urus dengan semua pihak-pihak yang berkepentingan;
- (v) program pendidikan pengundi kepada bakal pemilih; dan
- (vi) menyemak keperluan logistik bagi persediaan menghadapi Pilihan Raya Umum Ke-15 yang akan datang.

SPR sedang mengadakan proses Semakan Pra-Pendaftaran Pemilih Automatik (SPPA) sehingga 31 Oktober 2021. SPPA diadakan bertujuan memberi peluang kepada warganegara Malaysia berumur 18 tahun dan ke atas sehingga 31 Disember 2021 dan belum mendaftar sebagai pemilih untuk menyemak dan mengesahkan maklumat mereka dengan SPR sebelum didaftarkan sebagai pemilih secara automatik.

SPR menjangkakan semua persiapan yang sedang diambil tindakan termasuklah menangani isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada 31 Disember 2021.

Justeru, **SPR komited untuk memastikan umur kelayakan pengundi 18 tahun dan pendaftaran pemilih secara automatik dilaksanakan berdasarkan kepada keputusan semakan kehakiman di Mahkamah Tinggi Kuching, Sarawak pada 3 September 2021 yang lalu.**

Tuan Yang di-Pertua,

Dalam usul Rang Undang-Undang (RUU) Anti-Lompat Parti dan mengehendkan tempoh jawatan Perdana Menteri tidak melebihi 10 tahun, Kerajaan memberi fokus terhadap keperluan melaksanakan sesi libat urus dengan pelbagai pihak, badan-badan bukan Kerajaan (NGO) dan parti-parti politik apabila ada di antara perkara-perkara tersebut memerlukan pindaan Perlembagaan Persekutuan atau gubalan RUU baharu sebagai suatu dasar baharu negara. Ini bagi memastikan RUU, peraturan dan dasar yang akan diperkenalkan oleh Kerajaan mendapat sokongan semua pihak. Kerajaan juga akan turut mempertimbangkan cadangan pindaan Perlembagaan Persekutuan dan RUU yang ingin dibentangkan dibawa untuk penelitian Jawatankuasa Pilihan Khas Parlimen terlebih dahulu, yang mana Jawatankuasa Pilihan Khas Parlimen boleh melibatkan pihak luar dalam menilai cadangan Kerajaan.

Tuan Yang di-Pertua,

Kesemua perkara yang dinyatakan ini adalah keputusan dasar yang amat penting, yang mana perlu dipertimbang secara menyeluruh. Justeru, adalah wajar cadangan ini diperbincang dan diperhalusi secara bersama oleh kepimpinan semua parti komponen bi-partisan selain mengambil kira penglibatan pelbagai pihak berkepentingan termasuk badan bukan Kerajaan dan rakyat umumnya.

Oleh yang demikian, hasil perbincangan dan dapatan daripada sesi libat urus yang akan diadakan dianalisa dan dimuktamadkan sebagai parameter gubalan Rang Undang-Undang berkaitan atau undang-undang yang seumpamanya untuk sesi pembentangan yang dijangka pada sesi Parlimen 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 16 NOVEMBER 2021 (SELASA)

SOALAN

TUAN NGA KOR MING [TELUK INTAN] minta **PERDANA MENTERI** menyatakan:-

- (a) berapa jumlah kos pembinaan kediaman rasmi Perdana Menteri iaitu Seri Perdana dan Timbalan Perdana Menteri, Sri Satria ; dan
- (b) senaraikan butir-butir kerja dan jumlah kos untuk membaiki kediaman rasmi Perdana Menteri dan Timbalan Perdana Menteri sejak ia siap dibina dan senaraikan kos penyelenggaraan tahunan kedua-dua kediaman rasmi ini termasuk bil elektrik, air dan lain-lain kos.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Di Pertua,

1. Kompleks Kediaman Rasmi YAB Perdana Menteri (Kompleks Seri Perdana) dan YAB Timbalan Perdana Menteri (Kompleks Sri Satria) telah dibina pada tahun 1997 dengan peruntukan keseluruhan untuk pembinaan kedua-dua kediaman rasmi ini adalah sebanyak RM172.2 juta.
2. Kedua-dua kompleks ini bukan sahaja digunakan sebagai tempat kediaman sahaja, malah di dalam kompleks berkenaan juga terletak beberapa bangunan dan ruang yang digunakan untuk majlis-majlis rasmi negara. Selain itu, kompleks ini juga akan digunakan untuk majlis-majlis bagi menyambut tetamu-tetamu utama dari luar negara.
3. Memandangkan Kompleks Seri Perdana dan Sri Satria telah menjangkau usia lebih daripada 20 tahun, keperluan penyelenggaraan adalah amat penting untuk memastikan semua fasiliti dan kemudahan di kompleks tersebut akan sentiasa terpelihara dalam keadaan yang baik dan kekal berfungsi sebagaimana yang dikehendaki. Tahap keselamatan (*safety & security*) kedua-dua kompleks ini juga perlu dititik beratkan melalui penyelenggaraan yang dijalankan dari semasa ke semasa.
4. Pengurusan fasiliti yang telah dilaksanakan terhadap kompleks ini adalah secara berkala dan mengikut keperluan yang mendesak. Mengambil kira hal demikian, kos penyelenggaraan tahunan semasa bagi kedua-dua kompleks berkenaan adalah sebanyak RM6.45 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 16 NOVEMBER 2021 (SELASA)

SOALAN:

DATO' SRI AZALINA OTHMAN SAID [Pengerang] minta **PERDANA MENTERI** menyatakan:-

- (a) tindakan atau respon oleh Kerajaan Malaysia berhubung pendedahan oleh Kertas Pandora yang mendakwa terdapat warganegara Malaysia yang mempunyai simpanan dan aset jutaan ringgit di luar negara; dan
- (b) adakah Kerajaan bercadang untuk meletakkan pegawai Suruhanjaya Pencegah Rasuah Malaysia (SPRM) di luar negara bagi menyiasat jenayah kewangan yang melibatkan individu, organisasi atau syarikat yang berkaitan dengan rakyat Malaysia.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Pandora Papers sebenarnya merupakan satu lagi pendedahan oleh International Consortium of Investigative Journalists (ICIJ) sebagaimana pendedahan yang pernah dibuat sebelum ini iaitu Offshore Leaks (2013), Panama Papers (2016) dan Paradise Papers (2017). Dalam pendedahan Pandora Papers, ICIJ hanya menyenaraikan siapa yang pernah atau yang sedang memiliki saham atau menjadi pengarah dalam syarikat di luar negara ataupun *offshore*.

Secara dasarnya, penggunaan akaun luar pesisir bukanlah satu kesalahan di bawah undang-undang Malaysia dan tindakan akan diambil sekiranya terdapat bukti berkaitan salah laku jenayah mana-mana individu atau syarikat. Struktur Kewangan Malaysia dikendalikan oleh Bank Negara Malaysia melalui Akta Perkhidmatan Kewangan 2013 [Akta 758], Akta Perkhidmatan Kewangan Islam 2013 [Akta 759] dan Akta Perniagaan Perkhidmatan Wang 2011 [Akta 731].

Aktiviti penguatkuasaan dan pematuhan transaksi wang ke luar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2021 (AMLA) [Akta 613] dan akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk keluar negara.

AMLA dikuatkuasakan oleh agensi-agensi penguatkuasaan seperti Polis Diraja Malaysia (PDRM), Suruhanjaya Pencegahan Rasuah Malaysia (SPRM), Jabatan Kastam Diraja Malaysia (JKDM), Lembaga Hasil Dalam Negeri (LHDN), Bank Negara Malaysia (BNM) sebagai pihak

berkuasa berwibawa (*competent authority*) di bawah AMLA sentiasa bersedia memberi bantuan dan sokongan kepada agensi-agensi tersebut.

Manakala aktiviti kewangan luar pesisir Malaysia dikawal selia oleh *Labuan Financial Services Authority* (Labuan FSA) melalui penguatkuasaan Akta Perkhidmatan Kewangan dan Sekuriti Labuan 2010 [Akta 704] dan Akta Perkhidmatan Kewangan dan Sekuriti Islam Labuan 2010 [Akta 705]. Aktiviti penyelarasan dan aktiviti penguatkuasaan bersama juga telah dilaksanakan terutama melalui *National Anti-Financial Crime Centre* (NFCC), penguatkuasaan dan kawalan sempadan termasuk pemantauan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 16 NOVEMBER 2021 (SELASA)

SOALAN

TUAN STEVEN CHOONG SHIAU YOON [TEBRAU] minta **PERDANA MENTERI** menyatakan sama ada Kementerian akan menubuhkan mahkamah khas untuk kes-kes gangguan seksual kanak-kanak dan kes-kes jenayah lain terhadap kanak-kanak. Sekiranya tidak, apa sebabnya dan macam mana kes-kes jenayah terhadap kanak-kanak dapat diselesaikan dengan baik.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada masa ini kes-kes gangguan seksual kanak-kanak adalah dibicarakan di Mahkamah Jenayah Seksual Kanak-Kanak (MJSKK). MJSKK telah ditubuhkan sejak tahun 2017 bagi membicarakan kes-kes jenayah seksual yang melibatkan mangsa kanak-kanak termasuklah kesalahan yang dituduh di bawah Kanun Keseksaan [Akta 574] dan juga Akta Kesalahan-Kesalahan Seksual Terhadap Kanak-Kanak 2017 [Akta 792].

Sekian, terima kasih.